



Siujvaz dwg boux lwghag ceiq lauxgauj ndeu, song sam ngoenz couh deuz hag baez ndeu. Aen haggeiz gonq, Veiz lauxsae son yijvwnz ngamq daeuj dang bancujyin ban de, Veiz lauxsae hwnjdangz ngoenz daih'it couh raen Siujvaz mbouj daeuj hwnjdangz lo, cuengqhag le, Veiz lauxsae couh hai aen cimozdoz de bae ranz Siujvaz. Gvaq yaep ndeu, cijraen

Veiz lauxsae boux dog gag gwih ci dauqma.

Boux son suyoiz Yangz lauxsae raen le, cam naeuz: "Siujvaz vihmaz mbouj caeuj mwngz doxcaez ma ne?" "De mbouj youq ranz." Veiz lauxsae naeuz, "Vunz ndaw ranz hix mbouj rox de bae gizlawz, daxboh de lij naeuz daeglwg de gyaez guh maz couh guh maz ba dem."

Deuzhag

东兰县武篆镇中心小学 Veiz Canghsung

Yangz lauxsae miz di hozndat: "Gijmaz daidu ya? Bohmeh cungj yienghneix lo, raeuz guh lauxsae lij nyapnyuk guh maz? Gyaez daeuj mbouj daeuj mbouj guenj de lo."

Veiz lauxsae ngauzngauz gyaauj, naeuz: "Raeuz guh lauxsae, mbouj caeuj gyahcangj geiq gijneix." Ngoenz daihngaih, de youh gwih aen cimozdoz de bae ranz Siujvaz. Baenz-neix cijaeu Siujvaz mbouj daeuj hagdangz, Veiz lauxsae couh hwnj ranz de bae, fwnrumz mbouj dingz.

Couh youq Veiz lauxsae hwnj ranz Siujvaz geij baez le, Siujvaz couh caiq hix mbouj deuzhag lo.

Ngoenz ndeu, Yangz lauxsae gwih ci bae hagdangz, buenq roen bungz daengz Siujvaz, Siujvaz yousim swheij cizdau, cam Yangz lauxsae ndaej hawj de caez naengh ci bae hag lwi? Yangz lauxsae gamjdaengz gig geizgvaiq, cam de: "Mwngz soqlaiz cungj mbouj lau deuzhag, lij lau

cizdau?" Siujvaz naj nding naeuz: "Neix dwg gaxgonq lo, seizneix gou caiq hix mbouj gamj cizdau roxnaeuz deuzhag lo, gou lau Veiz lauxsae youh bae ranz ra boh gou."

Yangz lauxsae geizgvaiq cam: "Veiz lauxsae moix baez bae ranz mwngz cungj gangj gijmaz ne?" "Gijmaz hix mbouj gangj." Siujvaz ngauzngauz gyaauj, "De couhdwg youq henz yawj daxboh gou caeuj vunzlai dwkbej."

Yangz lauxsae doeksaetyat: "Neix mwngz lau gijmaz ne?" Siujvaz mbwnjmbwnj bak han: "Mwngz mbouj rox, danghnaeuz Veiz lauxsae lauxlaux saedsaed naengh youq henz yawj couh sueng lo, hoeng de cungj gyaez son boux henz, cijaeu de baez son, daxboh gou couh saw cienz. Miz ngoenz ndeu, daxboh gou saw baenz cien lai maenz, dauq ranz couh hujdengdeng dwk ndaq gou naeuz, danghnaeuz baez-laeng gou lij deuzhag, de couh euj ga gou raek bae!"

Raemxdanggaeq Daxmeh

Youq ranz gou, haglig ceiq sang couh dwg daxmeh lo—— De dwg yenzgiuswngh. Mboujgvaq, daxmeh cawj byaek saedcaih couhdwg suijbingz siujhagseng. De cawj "byaekhau cauj nohsei" "makyungz cauj gyaecgaeq" doenghgi byaek neix lij maqhuz ndei gwn, hoeng baez cawj bya cawj noh daengj byaek guh fukcab di, de couh mbouj rox cawj lo.

Mboengqneix, daxmeh raen gou miz di byom, ndangdaej miz di nyieg, de couh siengj cawj yiengh he doiq de daeuj gangj miz di dwgrengz haenx—— cawx duz gaeq he ma cawj hawj gou boujbouj.

Daxmeh cawx duz gaeqdon caet gaen naek he ma, yaek yungh buenq he daeuj cawj dang, lingh buenq he ngoenz wnq hawj daxboh guh hoengzcauh. Ma daengz ranz, de yawj duzgaeq hunghaenghaeng haenx, mbouj rox baenzlawz roengzfwngz. Yienghneix, de dwk dienhvah hawj yahdaiq, cam yahdaiq baenzlawz cawj raemxdanggaeq. Yahdaiq daengq daxmeh, gyaaujgaeq caeuj soenjgaeq mbouj gwn, dungxaej cawz seuq, daegbied dwg mbeigaeq mbouj ndaej hawj vaih, mboujnex nohgaeq couh haemz…… Daxmeh ciuq yahdaiq gangj bae guh, hoeng mwh ra mbeigaeq couh bungz daengz mazfanz lo, daxmeh youq ndaw saej daep daw ra bae ra dauq cungj ra mbouj raen mbeigaeq. Daxmeh gip lo, danghnaeuz mbeigaeq vaih lo, yienghneix duzgaeq neix couh gwn mbouj ndaej lo. Doeklaeng, ginggvaq lai baez cam, daxmeh duenqdingh mbeigaeq youq mwh gaj gaeq couh cawz bae lo. Ai, mbouj miz gingniemh couh baenz vahriu ha!

Duzgaeq swiq seuq lo, daxmeh couh

siengj baenzlawz aeu duzgaeq faen baenz song faenh. Caxbyaek bingzseiz ronq byaek haenx dwg yungh mbouj ndaej lo, yungh geuz daeuj daet ba! Hoeng faggeuz yawj hwnjbae raehrwd neix daet mbouj ndaej ndokgaeq. Daxmeh cij ndei ra cax ndaw gvi hix daxboh bingzseiz yungh daeuj raemj ndok haenx okdaeuj. Fag cax neix youh hung youh naek, danghnaeuz mbouj siujsim dawz mbouj maenh…… siengjsiengj caen dwglau ha! Daxmeh doiqcinj laeng gaeq, laep song da raemj roengzbae, raemj mbouj deng, caiq raemj……

Nyaengq baenz buenq ngoenz, danggaeq cawj ndei lo. Mwh gwn haexcaez, gou gwn gaemz dang he, cam: "Meh, raemxdang baenzlawz baenzneix cit ha?" Daxboh riu naeuz: "Aeya, mwngz youh lumz cuengq……"

Mwngz naeuz, daxmeh "yenzgiuswngh" gou, dwg mbouj dwg wnggai bae "daihag dajcawj" ndeindei hag baenzlawz cawj byaek ne?

(seiq nienzgaep Dangh Ningz)



Gyoengq Manaez Ok Congh

Gyoengq manaez ndeu deng boux canghdwknyaen gyaep haeuj ndaw cong.

Boux canghdwknyaen youq bakcong cang aen gabnyaen ndeu. Duz manaez lawz ok cong gonq dingh deng aen gabnyaen neix gab dawz, hoeng manaez wnq couh ndaej gouq lo.

Gyoengq manaez youq ndaw cong deng iek sam ngoenz sam hwnz le, couh doxcaez yaeng aen saeh byawz ok cong gonq neix.

Duz manaez geq naeuz: "Nienzgeij gou ceiq laux, gou ok cong gonq mbouj hablex ba."

Duz manaez iq naeuz: "Gou ceiq iq, mbouj wngdang gou okbae gonq."

Meh manaez naeuz: "Ranz gou lij miz sam lwg manaez caj gou ma ranz cij gyoengqde. Sou nyaenxsim hawj gyoengqde dai iek ha?"

Duz manaez gvez naeuz: "Gou gaenq deng sieng lo, wnggai ciuqgoq gou."

Cij lw duz manaez maengh ndeu lo, de naeuz: "Gou nyienh okbae gonq. Mboujgvaq, danghnaeuz gou okbae doeklaeng, gou ndaej vih sou boizhaemz, bae haeb boux canghdwknyaen haenx dai bae."

Gvaq geij ngoenz, boux canghdwknyaen daj ndaw cong rag gyoengq manaez dai iek ndeu okdaeuj lo.

(Bungz Vancouh/彭万洲 sij Lij Yunswng/吕润生 hoiz)